

## OMNI DIE DIC MARIAE

1. Omni die dic Mariae  
Mea laudes anima:  
Ejus festa, ejus gesta  
Cole devotissima.
2. Contemplare et mirare  
Ejus celsitudinem:  
Dic felicem genitricem,  
Dic beatam Virginem.
3. Ipsam cole, ut de mole  
Criminum te liberet,  
Hanc appella, ne procella  
Vitiorum superet.
4. Haec persona nobis dona  
Contulit coelestia;  
Haec regina nos divina  
Illustravit gratia.
5. Lingua mea, dic trophaea  
Virginis puerperae,  
Quae inflictum maledictum  
Miro transfert germine.
6. Sine fine dic Reginae  
Mundi laudum cantica,  
Ejus bona semper sona,  
Semper illam praedica.
7. Omnes mei sensus ei  
Personate gloriam;  
Frequentate tam beatae  
Virginis memoriam.
8. Nullus certe tam disertae  
Extat eloquentiae,  
Qui condignos promat hymnos  
Ejus excellentiae.
9. Omnes laudent, unde gaudent,  
Matrem Dei Virginem;  
Nullus fingat, quod attingat  
Ejus celsitudinem.
10. Sed necesse, quod prodesse  
Piis constat mentibus.  
Ut intendam, quo impendam  
Me ipsius laudibus.
11. Quamvis sciam, quod Mariam  
Nemo digne praedicet,  
Tamen vanus et insanus  
Est, qui illam reticet.
12. Cujus vitae eruditae  
Disciplina coelica,  
Argumenta et figmenta  
Destruxit haeretica.
13. Hujus mores tanquam flores,  
Exornant ecclesiam  
Actiones et sermones  
Miram praestant gratiam.
14. Evae crimen nobis limen  
Paradisi clauserat,  
Haec dum credit et oboedit,  
Coeli claustra reserat.
15. Propter Evam homo saevam  
Accepit sententiam:  
Per Mariam habet viam,  
Quae ducit ad patriam.
16. Haec amanda et laudanda  
Cunctis specialiter:  
Venerari et precari  
Illam decet jugiter.
17. Ipsa donet, ut, quod monet  
Natus ejus, faciam:  
Ut finita carnis vita,  
Laetus hunc aspiciam.
18. O, cunctarum feminarum  
Decus atque gloria!  
Quam electam et evectam  
Scimus super omnia.
19. Clemens audi, tuae laudi  
Quos instantes conspicias:  
Munda reos, et fac eos  
Donis dignos coelicis.
20. Virga Jesse, spes oppressae  
Mentis et refugium;  
Decus mundi, lux profundi,  
Domini sacrarium.
21. Vitae forma, morum norma,  
Plenitudo gratiae:

Dei templum, et exemplum  
Totius justitiae.

22. Virgo salve, per quam valvae  
Coeli patent miseris:  
Quam non flexit, nec allexit  
Fraus serpentis veteris.

23. Generosa et formosa  
David regis filla,  
Quam elegit Rex, qui regit  
Et creavit omnia.

24. Gemma decens, Rosa recens;  
Castitatis liliū:  
Castum chorū ad polorū  
Quae perducis gaudium.

25. Actionis et sermonis  
Facultatem tribue,  
Ut tuorum meritorū  
Laudes promam strenue.

26. Opto nimis, ut imprimis  
Des mihi memoriā,  
Ut decenter et frequenter  
Tuam cantem gloriā.

27. Quamvis muta et polluta  
Mea sciam labia:  
Praesumendum nec silendum  
Est de tua gratia.

28. Virgo gaude, omni laude  
Digna et praeconio:  
Quae damnatis libertatis  
Facta es occasio.

29. Semper munda et foecunda,  
Virgo tu puerpera  
Mater alma, velut palma  
Florens et fructifera.

30. Tuo flore et decore  
Recreari cupimus:  
Cujus fructu nos a luctu  
Liberari credimus.

31. Pulchra tota, sine nota  
Cujuscumque maculae  
Fac nos mundos et jucundos,  
Te laudare sedule.

32. O beata, per quam data  
Nova mundo gaudia  
Et aperta, fide certa,  
Regna sunt coelestia.

33. Per te mundus laetabundus,  
Novo fulget lumine,  
Antiquarum tenebrarum  
Exutus caligine.

34. Nunc potentes sunt egentes,  
Sicut olim dixeras:  
Et egeni fiunt pleni,  
Ut tu prophetaveras:

35. Per te morum nunc pravorum  
Relinquantur devia:  
Doctrinarum perversarum  
Pulsa sunt ludibria.

36. Mundi luxus atque fluxus  
Docuisti spernere:  
Deum quaeri, carnem teri,  
Vitiis resistere.

37. Mentis cursum tendi sursum,  
Pietatis studio  
Corpus angi, motus frangi,  
Pro coelesti praemio.

38. Tu portasti, inter casti  
Ventricis claustra, Dominum  
Redemptorem, qui honorem  
Nobis reddit pristinum.

39. Mater facta, sed intacta,  
Genuisti Filium,  
Regem regum, atque rerum  
Creatorem omnium.

40. Benedicta, per quam victa  
Hostis est versutia:  
Destitutis spe salutis  
Datur indulgentia.

41. Benedictus Rex invictus,  
Cujus Mater crederis:  
Increatus ex te natus,  
Nostri salus generis.

42. Reparatrix, consolatrix  
Desperantis animae!

A pressura, quae ventura  
Malis est, me redime.

43. Pro me pete, ut quiete  
Sempiterna perfruar;  
Ne tormentis comburentis  
Stagni miser obruar.

44. Quod requiro, quod suspiro,  
Mea sana vulnera,  
Et da menti te poscenti,  
Gratiarum munera.

45. Ut sim castus, et modestus,  
Dulcis, blandus, sobrius,  
Pius, rectus, circumspectus,  
Simultatis nescius:

46. Eruditus et munitus  
Divinis eloquiis,  
Timoratus et ornatus  
Sacris exercitiis.

47. Constans, gravis, atque suavis,  
Benignus, amabilis:  
Simplex, purus et maturus,  
Patiens et humilis:

48. Corde prudens, ore studens  
Veritatem dicere:  
Malum nolens, Deum colens  
Pro semper opere.

49. Esto tutrix et adjutrix  
Christiani populi:  
Pacem praeserta, ne molesta  
Nos perturbent saeculi.

50. Salutaris stella maris,  
Summis digna laudibus,  
Quae praecellis cunctis stellis,  
Atque luminaribus.

51. Tua dulci prece fulci  
Supplices et refove:  
Quidquid gravat vel depravat  
Mentes nostras, remove.

52. Virgo gaude, quod de fraude  
Daemonum nos liberas:  
Dum in vera et sincera  
Carne Deum generas.

53. Illibata et dotata  
Coelesti progenie,  
Gravidata, nec privata  
Flore pudicitiae.

54. Nam quod eras, perseveras,  
Dum intacta generas:  
Illum tractans, atque lactans,  
Per quem facta fueras.

55. Commendare me dignare  
Christo, tuo Filio:  
Ut non cadam, sed evadam  
De mundi naufragio.

56. Fac me mitem, pelle litem,  
Compesce lasciviam:  
Contra crimen da munimen,  
Et mentis constantiam.

57. Non me liget, nec fatiget  
Saeculi cupiditas:  
Quae indurat et obscurat  
Mentes sibi subditas.

58. Nunquam ira, nunquam dira  
Me vincat elatio:  
Quae multorum fit malorum  
Frequenter occasio.

59. Ora Deum, ut cor meum  
Sua servet gratia:  
Nec antiquus inimicus  
Seminet zizania.

60. Da levamen, et juvamen  
Tuum illis jugiter,  
Tua festa, tua gesta  
Qui colunt alacriter. Amen.